

太上靈寶補謝竈玉經

道言昔登崑崙之山有一老母獨處其中莫知其由是時即有妙行真人上白
天尊曰此之老母未審復是何人獨住此山殊無畏懼

天尊曰惟此老母是名種火之母能上通天界下統五行達於神明觀乎二炁在天則為天帝在人間乃為司命又為北斗七元使者主人壽命長短富貴貧賤掌人職祿又為五帝竈君管人住宅十二時辰普知人間之事每月朔日記人造諸善惡及其功德錄其輕重夜半奏上天曹定其簿書悉是此母也凡人家竈皆有禁忌若不忘之此母能致禍殃弗可免也妙行真人曰凡人家竈未審有何忌諱敢問斯言幸垂教示臣見衆生安知其趣願將告諸濁世男女普令忌之得諧安穩天尊曰子可諦受人家竈不可以雞毛大骨頭髮刀斧不淨柴新穢污等物觸犯竈神即致男女不安經求無利疾患瘡痲癩狂瘵疫眼目昏昧夢想顛倒田蠶不收六畜虛耗

今客鬼無懼亂入宅中難大作怪盜賊侵欺口舌妄起男女邪迷官府禁錮家業流亡皆為觸犯所致若有此難急宜謝之可請東方青帝竈君南方赤帝竈君西方白帝竈君北方黑帝竈君中央黃帝竈君五方五帝竈君

夫人天爵靈竈地尉神竈天帝婿男婿女肉中童子童男童女曾竈祖竈公竈母竈夫竈婦竈子竈孫家竈外竈大竈小竈長竈短竈新竈舊竈五方遊奕竈君左右將軍炊湯神女前後直符竈君小使進火神母遊火童子竈家娘子姊妹新婦七十二竈侍從神衆弟子夫妻眷屬大小並是凡夫不知禁忌觸犯者多不自省悟或作東西或修南北將刀向竈驚動尊神洒後高聲妄言綺語以足進火露體赤身男女穢污烹宰腥羶歌吟府內叫喚竈前致使三災競起百怪俱生財物耗散疾病連綿田蠶不利仕宦不運買賣無益宅舍衰遠惡人謀害六畜不享夢想顛倒所求不遂即當虔誠願陳懺謝
天尊曰能如是念禍必驅之吾當為汝末世

衆生召請此母大降靈通救過宥罪致福受慶人口康泰永歲無殃青龍鬱鬱白虎鏘鏘朱雀燦燦玄武堂堂冤家伏匿盜賊潛藏火光入地百怪消泮於是妙行真人聞
天尊說此老母是名

天帝司命能掌人間罪福之事普示群生而為頌曰
天帝臨位 司命竈君 世人恭敬 福祿咸臻
去除災難 疢癘潛奔 仰依誨示 普得安存
天尊再告真人曰末世男女衝突竈君有災有患皆須清淨掃灑明燈燒香請道士轉經呼必竈君眷屬名字奏獻錢財或供飲食為人所利子之所受除言誦為妙行真人乃稽首聽命信受奉行
太上靈寶補謝竈玉經